

1 Timoteo

Ti Pabloe ta sts'iba batel scarta ta stojol ti Timoteoe

¹ Vu'un Pabloun, yajcholc'opun ti Jesucristoe. Pabilun ta mantal yu'un ti Jcoltavanej Dios cu'untique schi'uc ti Cajvaltic Jesucristoe, ti ja' spatobil co'ntontique. ² Ta jts'ibabot talel ti jcarta li'e, Timoteo, ti bats'i jnich'onot ta sventa ti laj ach'un ti sc'op Cajvaltic ti laj calbote. Ta jc'an ti ac'o yac'bot bendición ti Jtotic Diose schi'uc ti Cajvaltic Jesucristoe. Ac'o xc'uxubinot. Ac'o yac'bot jun avo'nton.

Ti bijubtasel yu'un ti chopol jchanubtasvanejetique

³ Ti c'alal ta xa xibat ta Macedoniae, laj jc'anbot volol ti ta xacom li' ta jteclum Efesoe, yo' jech ta xapajtsan ti buch'utic ja' no'ox ta snopben stuquic ti c'usi ta xchanubtasvanique. ⁴ Albo ya'iic ti mu me sts'etan schiq'uinic ta ya'yiell ti mu xlaj ta alel sc'oplal yu'un ti smuc'tot syayaique. Yu'un taje, ja' no'ox ta sliques c'op. Mu'yuc c'usi bal o. Yu'un ma'uc ta scoltaotic ta xch'unel ti Cajvaltique ti c'alal jech ta sc'an ti Dios ti ta jch'untique.

⁵ Ti jech ta xcal ti mantal taje, ja' ta jc'an ti ac'o c'ux ta xca'i jbatice ta jujun tale. Yu'un ti mi c'ux ta xca'i jbatique, tey ta xvinaj o ti tuc' ti co'ntontique, ti oy slequilal ti jol co'ntonique, ti jun co'ntontic jch'unojtic ti Cajvaltique. ⁶ Yu'un

oy jlom laj xa xch'ayic ta yo'ntonic ti jech taje. Ja' yu'un un, tey xa ich'ayic ta be ta scoj ti ta stsacolan sbaic ta c'op ti mu'yuc smelole. ⁷ Ti stuquique sbisoj sbaic ta jchanubtasvanejetic yu'un ti mantale. Pero mi ja'uc ta xa'ibeic smelol ti c'usi ta xalique ac'o mi sjunul yo'ntonic ta xchanubtasvanic yu'un ti mantale.

⁸ Jna'tic ti oy stu ti mantale. Pero ja' no'ox mi jna'tic ti bu ta xtune. ⁹ Ta sc'an ta jna'tic lec ti ma'uc ta xich'ic mantal ti buch'utic lec ono'ox ta spasique. Yu'un ja' no'ox ta xich'ic mantal ti buch'utic jsa'letoetique, ti jbjaman-taletique, ti buch'utic mu'yuc sch'ulelique, ti jsa'muliletique, ti buch'utic mu xich'ic ta muc' ti Diose, ti buch'utic mu xich'ic ta muc' ti c'usi ch'unbile, ti buch'utic ta smil ti stot sme'ique, ti jmilvanejetique. ¹⁰ Ta xich'ic mantal ti buch'utic ta xmulivajique, ti buch'utic ta stsac sbaic ti co'ol viniquetique, ti buch'utic ta xch'ayvanique, ti jutc'opetique, ti jutbil ta sva'anic ta rextigo ti Diose. Ja' jech xtoc ta xich'ic mantal ti buch'utic mu xco'olaj schi'uc ti lequil ach' c'op ti c'usitic ta spasique. ¹¹ Ti va'i s'elan ta xcale, yu'un ja' co'ol schi'uc ti ch'ul colebal ach' c'o'ope, ti ja' laj yac'bun jbain ta yalel ti ch'ul Diose.

Matanal ti c'uxubinel yu'un ti Diose

¹² Coliyalbun ti Cajvaltic Jesucristoe ti jech laj yac'bun quip ta yabtelanel taje. Yu'un laj yilun ti jun co'ntone. Jech o xal un, laj yic'un ta yajtunel. ¹³ Ac'o mi laj jchopol-c'opta ta vo'nee, ac'o mi laj quilbajin, ac'o mi laj jsa'be smul, pero q'uel avil c'u s'elan laj spasbun ti Diose. Laj xc'uxubinun.

Yu'un ma'uc to ox jch'unolajelun. Jech o xal un, mu laj jna' ti c'usi laj jpase. ¹⁴Toj ech'em smuc'ul ti bendición laj yac'bun ti Cajvaltique. Yu'un laj scoltaun ta xch'unel ti stuque, ti jech oy ti sc'uxul co'ntone, ti ja' ta jtatic ti jech oyotic ta stojol ti Cristo Jesuse. ¹⁵Ti Cristo Jesuse ital li' ta sba banomile yo' jech tal scolta ti jsa'muliletique. Ti jech taje, ja' melel. Jech o xal un, ac'o xch'unic scotolic. Yu'un ti vu'une banquialal jsa'mulilun to ox. Ja' mu sta ti yane. ¹⁶Ti jech taje, jech o xal un, laj xc'uxubinun ti Diose, yo' jech ta xvinaj ta jtojol ti vu'un banquialal jsa'mulilune, ti ta sjunul yo'nton laj sts'icbun jmul ti Jesucristoe. Ti jech taj une, ja' svinajeb ti xu' jech ta staic scuxlejalic sbatel osil ti buch'utic ta xch'unique. ¹⁷Jech o xal un, la' cac'tic ta ich'el ta muc', la' calbetic yutsilal slequialal ti Ajvalil sbatel osile, ti mu xchame, ti mu xvinaj ta q'uelele, ti ja' no'ox Dios stuc ti jelavem ti sbijile. Jechuc. ¹⁸Nich'on Timoteo, jech ta xcalbot ava'i li'e. Sujo aba ta spasel ti avabtele jech chac c'u cha'al laj yalic ono'ox ac'oplal ti quermanotic ti jech i'ac'bat sna'ic yu'un ti Diose. Vu'uc avu'un ti avabtele ta sventa ti ach'unoj ti Cajvaltique, ta sventa ti oy slequialal ajol avo'ntone. ¹⁹Yu'un oy jlom ti mu'yuc laj yaq'uic ta venta ti c'usi ac'bat sna'ic yu'un ti sjol yo'ntonique. Jech o xal un, ich'ayic ta be ta yich'el ta muc' ti Cajvaltique. ²⁰Yu'un ja' jech ic'ot ta stojolic ti Himeneoe schi'uc ti Alejandro. Ti vu'une laj cac' ta sc'ob ti pucuje, yo' jech ta xchanic ti mu ta xchopol-c'optaic ti Diose.

2

Bijubtasel ta sc'oponel ti Diose

¹ Ti c'usi tsots sc'oplale, ta jc'ubanboxuc ti c'anbeic ti Diose, ti c'oponique, ti vocoletanique, ti colaval, utic ti Dios yu'un scotol ti cristianoetique. ² Ta sc'an ti ta xac'oponbeic Dios ti ajvaliletique, ti j'opisialetique, yo' jech mu'yuc c'usi jna'tic, yo' jech jun co'ntontic ti li' cuxulotique, yo' jech ich'bilotic ta venta yu'un ti Diose, yo' jech lec ti jc'oplaltique. ³ Ti jech taje, lec ta xil ti Diose ti ja' Jcoltavanej cu'untique. ⁴ Yu'un ti stuque ta sc'an ti ac'o sta scolel scotol ti cristianoetique, ti ac'o yojtiquinic ti melele. ⁵ Jun no'ox ti Diose. Jun no'ox ti Buch'u ta sventa yo' jech ta staic ti cristianoetic ti lec ta xil sbaic schi'uc ti Diose. Ti Buch'u jech taje, ja' ti vinic Jesucristoe. ⁶ Ti Jesucristoe laj yac' sba ta milel yo' jech ta stojbe scoltael scotol ti cristianoetique. Ti jech taje, sta xa yorail ti laj yac' ta na'el ti Diose. ⁷ Ja' yu'un un, li'ac'bat ti cabtele ti li'och ta jchalc'ope, yo' jech ta jchanubtas ti jyanlumetic ta yich'el ta muc' ti Cajvaltique schi'uc ti sc'op ti ja' melele. Ti jech jch'unolajelun yu'un ti Cristoe, melel ti c'usi ta xcale. Mu xilo'lavan.

⁸ Jech o xal un, ti bu'yuc no'oxe, ta jc'an ti ta sc'oponic Dios ti viniquetique. Mu ta iluc. Mu ta c'opuc. Slequilaluc yo'ntonic ti c'alal ta stoy sc'obic ta sc'oponel ti Diose. ⁹ Ja' jech xtoc ti antsetique, ta sc'an ti lec lec no'ox sba ta slap ti sc'u'ique. Mu me syanijes sbaic. Ja' jech xtoc, mu me toj jelavemuc xac'be snichimal ti xpech' sjolique. Mu me sa'ic ti c'anal taq'uine, ti perla

tone, ti sc'u'ic ti toyol stojole. ¹⁰ Yu'un ti antsetic ti yac'oj sbaic ta sc'ob ti Diose, ja' yabtelic ti lec ta xaq'uic ta ilel ti c'usi ta spasique. ¹¹ Ti antsetique, ts'ijiluc ac'o ya'iic ti c'u s'elan ti chanubtasele. Ac'o snijan sbaic. ¹² Ti vu'une mu xcac' que ti ta xchanubtasvan jun ants ti ta tsobobbaile. Mi ja'uc ti ta spas ta mantal ti vinique. Yu'un ja' yabtel ti ts'ijil ta xa'i ti c'ope. ¹³ Yu'un ti Diose ja' ba'yel laj smeltsan ti Adane. Ts'acal to un, laj smeltsan ti Evae. ¹⁴ Ja' jech xtoc ma'uc ilo'laat ti Adane, ja' ti antse. C'alal jech ilo'laate, tey laj sta smul. ¹⁵ Pero ta xcol ti antse, ti mi ta sbis sba lec ta me'ile, mi j'ech'el xch'unoj ti Cajvaltique, mi oy sc'uxul yo'ntone, mi tuc' ti sjole.

3

Jech sc'oplal ti ancianoetique

¹ Ja' melel ti c'op li'e. Mi oy buch'u ta sc'an ta x'och ya'i ta ancianoile, ja' jun lequil abtel ta sc'an ta spas. ² Jech o xal un, ti buch'u ta x'och ta ancianoile, ta sc'an ti ta stuc'ulan sba ti c'u s'elan ta xcuxie yo' jech lec ti sc'oplale, ti jun no'ox ti yajnile, ti lec scuxlejale, ti tuc' ti sjol yo'ntone, ti yich'oj sba ta muq'ue, ti tey ono'ox ta xich' ta muc' ti yulo'tac ti ta xc'ot ta snae, schi'uc ti lec xtojob xchanubtasvane. ³ Ta sc'an ti ma'uc jun jyacubele, ti ma'uc jliquesejc'ope, ti ma'uc c'upijem yo'nton yu'un ti taq'uine. Ja' ta sc'an ti lecuc ti yo'ntone, ti lamajem yo'ntone, ti mu tsotsuc sc'oplal ta xa'i ti taq'uine. ⁴ Ja' ta sc'an ti xtojob lec ti c'u s'elan ta spas mantal ta yut snae, ti jch'unej mantaluc, ti sna'uc x'ich'van ta

muc' ti snich'nabe. ⁵ Yan mi mu xtojob ti c'u s'elan ta spas mantal ta yut snae, ¿c'usi xut ta stobjotas batel ti jch'unolajeletic yu'un ti Diose? ⁶ Ti buch'u ta x'och ta ancianoile, ma'uc ti ach' jch'unolajele. Yu'un xu' xlic stoy sba. Tey ta sta castigo jech chac c'u cha'al laj sta ti pucuje. ⁷ Ja' jech xtoc ta sc'an ti lec x'ilat yu'un ti ma'uc jch'unolajeletique. Yan ti mi mu jechuque, xu' nan ta xyanijesbat sc'oplal. Yic'al ta x'och ta spets' ti pucuje.

Jech sc'oplal ti diaconoetique

⁸ Ja' jech xtoc ti diaconoetique, ja' ta sc'an ti ja'uc lequil viniquetique, ti xc'ot xc'opojique, ti ma'uc c'upijem yo'ntonic yu'un ti taq'uine, ti mu xyacubic xtoque. ⁹ Ja' ta sc'an ti junuc yo'ntonic ta stojol ti c'usi lij'ac'bat jna'tic ti laj xa jch'untique. Ja' jech xtoc ti mu c'usi xal ti yo'ntonique. ¹⁰ Ta sc'an q'uelel ba'yel mi lec ta xbat ti yabtelique. Mi lec ibat yu'unique, xu' ta x'ochic ta diacono. ¹¹ Ja' jech xtoc ti antsetique, ja' ta sc'an ti yich'oj sbaic ta c'ac'ale, ti ma'ucuc ti jlo'iltavanejetique, ti lec stalele, ti tuc'uc scotol ti c'usi ta spasique. ¹² Ti diaconoetique, ta sc'an ti jun no'ox ti yajnile, ti xtojob lec ti c'u s'elan ta spas ta mantal ti snich'nabe, ti yut sna xtoque. ¹³ Yu'un mi lec ta spas yabtel ti diaconoetique, ta sta ti ich'bil ta muc' ta xc'ote. Ja' jech xtoc más to ta x'ayan ta yo'nton ta yalel ti xch'unuoj ti Cristo Jesuse.

Ti c'usi jch'unojtique mucul to ox

¹⁴ Co'ntonuc jc'an xtal jq'uelot ta ora. Pero ta jts'ibabot talel ti jcarta li'e, ja' ti mi lijaliye. ¹⁵ Ja'

yu'un un, xana' xa c'u s'elan ta sc'an ta spasic ti jch'unolajeletique ti ja' yu'untac ti cuxul Diose, ti ja' ta sva'an sbaic ta spojel ti melele, yo' jech mu xyanij. ¹⁶ Mu xa lo'iluc, ti c'usi laj xa yac' jch'untic ti Diose, yan sba smuc'ul ti ja' mucul to

oxe:

Co'ol s'elan cristiano laj yac' sba iluc ti Diose.

Vinajesbat sc'oplal yu'un ti Ch'ul Espiritu ti ja' jun lequil vinique.

Ja' jech i'ilat yu'un ti ángeletic xtoque.

Puchbat sc'oplal ta sbejel banomil.

Ch'unbil ta sbejel banomil.

Ja' jech xtoc ich'bil ta muc' ic'ot ta vinajel.

4

Ti buch'u ta xchibaj ta xch'unel ti Cajvaltique

¹ Jamal ta xal ti Ch'ul Espiritue ti c'alal sla-jebtic xa batel ti c'ac'ale, oy jlom ta xchi'baj ta xch'unel ti Cajvaltique. Yu'un tey chbat sts'aclic jlo'lavanej jchanubtasvanejetic ti ta xchanubtasvan ti c'usi i'ac'bat sna'ic yu'un ti pucuje. ² Yu'un tey ta sts'etan schiquinic ta ya'yiél sc'op ti jutc'op cristianoetic ti ta spac'ta sbaique. Yu'un co'ol xa s'elan c'aq'uem xa ta c'ac'al taq'uin ti sjol yo'ntonique. Mu xa xa'iic tijbel ti yo'ntonique.

³ Ti jutc'op cristianoetic taje ta xalic ti mu xu' xijnupune. Ja' jech xtoc ta xalic ti mu scotoluc stac' lajesel ti ve'liletique, ac'o mi pasbil ono'ox yu'un Dios ti ve'liletique ti xu' ta slajesic ti jch'unolajeletic ti xojtiquinic ti melele, ti ta xalbeic vocol ti Dios ti c'alal ta slajesique. ⁴ Yu'un scotol ti c'usi spasoj ti Diose, lec ono'ox. Altic ta jbajtic. Yu'un ja' no'ox ta sc'an ti colaval xcutic

ti Dios c'alal ta jlajestique. ⁵ Yu'un yaloj ti Dios ti lec scotole. Jech o xal un, colaval, xcutic ti c'alal ta jlajestique.

Ti jun lequil jtunel yu'un ti Jesucristoe

⁶ Ti mi jech ta xachanubtas ti jch'unolajeletic taje, ta meel umbi, ja' jun lequil jtunelot yu'un ti Jesucristoe. Ja' jech xtoc yacal ta xamalq'uin aba, ta xatsatsubtas avo'nton yu'un ti sc'op Dios ti jch'unojtique, schi'uc staoj yav ach'unoj ti c'usi lec lachanubtasate. ⁷ Mu xats'et-chiquinta ta ya'yiel ti vo'ne lo'iletic ti sventa banomil no'oxe, ti altic ta a'yiele. Ja' lec, ac'o persa yo' xu' ta xapas ti c'usi ta sc'an ti Diose. ⁸ Ti buch'u ta xchan yip ta anilajele, ta xtun yu'un jutuc. Yan ti buch'u ta xac' persa ta snopilanel ti c'usi ta sc'an ti Diose, ja' toj jtunel ta scotol. Ta xtun yu'unic ti jech li' to cuxulique. Ta xtun yu'unic ti bu ta xcuxiic o sbatel osile. ⁹ Meel ti c'op taje. Jechuc ac'o xch'unic scotolic. ¹⁰ Jech o xal un, ja' stu ti ta xij'abtejotique, ti ta jts'ictic ti ilbajinele. Yu'un tey jpatoj co'ntontic ta stojol ti cuxul Diose, ti ja' Jcoltavanej yu'un scotol ti cristianoetique. Pero ja' más to Jcoltavanej yu'un ti buch'u xch'unojique.

¹¹ Ja' yu'un un, ti jech laj calbot ava'i taje, ja' me jech xaval, ja' me jech xachanubtasvan. ¹² Ac'o iluc ta stojol ti jch'unolajeletique ti lec xac'opoje, ti tuc' ta xapase, ti jun avo'nton ach'unoj ti Diose, ti c'ux ta xava'i ti jch'unolajeletique, ti lec ta q'uelel ti acuxlejale. Ti mi jech ta xavac' iluque, manchuc mi quere-mot to, pero mu xu' xasbajic ti jch'unolajeletique.

¹³ C'alal mu to ta xic'ote, jech ti vo'ote, ja' me abtelano ta sq'uelel ti sc'op Dios ta stojol ti jch'unolajeletique. Tsatsubtasbo yo'ntonic ti quermanotique. Chanubtaso me. ¹⁴ Tunan me yu'un ti avabtele. Yu'un ja' abijil ti la'ac'bat yu'un ti Diose ti c'alal laj scajan sc'obic ta ajol ti ancianoetic yu'un ti jch'unolajeletique. Yu'un jech i'ac'bat sna'ic yu'un ti Diose.

¹⁵ Ja'uc me batuc o avo'nton schi'uc ti va'i s'elan laj calbote, yo' jech ta xilic scotolic ti lec ta xbat avu'une. ¹⁶ Ja' yu'un un, ich'o me aba ta c'ac'al. Bijan me ti c'usi ta xachanubtasvane. Junuc me avo'nton yu'un scotol. Ti mi jech ta xapase, ta xacol. Ja' jech xtoc ta xcolic ti buch'utic ta xa'iic ti ac'oipe.

5

Ti c'u s'elan ta pasel ta stojol ti jch'unolajeletique

¹ Mu me xajajanta ti buch'u mol xae. Lecuc no'ox xavalbe ti c'usi sc'an pasele. Bisó jech chac c'u cha'al junuc atot. Ja' jech xtoc ti querem viniquetique, bisó jech chac c'u cha'al junuc achi'il ta voq'uel. ² Ja' jech xtoc ti yayiletique, bisó jech chac c'u cha'al junuc ame'. Ja' jech xtoc ti tsebetique, tuc'uc me ajol ta stojol. Bisó jech chac c'u cha'al junuc achi'il ta voq'uel.

³ Coltao me xtoc ti me'lal antsetic ti buch'u mu'yuc c'usi x'ayan yu'unic ta melele. ⁴ Pero mi ja' jun me'lal ants ti oy yalabtaque, ti oy smamabtaque, ac'o spaquic sutel ti c'u s'elan laj yich'ic c'uxubinel yu'un ti stot sme'ique, yo' tey

ta xchanic talem ti c'uxubinvaneje. Ti mi jech ta spasique, lec ta x'ilatic yu'un ti Diose. ⁵ Yan ti me'lal ants ti solel stuc icom ta j'ech'ele, ti spatoy yo'nton xtoc ta stojol ti Diose, ti ta sta ta c'oponel c'ac'al ac'obale, ja' me sc'an c'uxubinel taje. ⁶ Pero ti jun me'lal ants ti ta spas ti c'usi ta sc'an ti yo'ntone, co'ol s'elan chamem manchuc mu cuxul to. Ti buch'u jech taje, mu xac'uxubinic. ⁷ Ti va'i s'elan ta xcalbot li'e, ja' me jech xavalbe ya'iic ti jch'unolajeletique, yo' jech mu xchopol-c'optaatic yu'un ti cristianoetique. ⁸ Yu'un ti buch'u mu xc'uxubin ti yuts yalale, ja' jech xtoc ti mu xc'uxubin ti tey ta yut snae ti c'alal más tsots sc'oplal sc'an c'uxubinele, ti buch'u jech taje, jech' ta xal ti xch'unoj ti Cajvaltique. Ja' más to lec ti buch'u ma'uc jch'unolajele.

⁹ Ja' no'ox me tsacho ta vun sbiic ti me'lal antsetic ti buch'utic yichojic más ta oxvinic (60) jabile. Pero ja' no'ox ti buch'utic laj xc'uxubin sbaic lec schi'uc ti anima smalale. ¹⁰ Ta sc'an ti ojtiquinbilic lec xtoc ti c'usi laj spasique, mi lec laj sts'ites ti yalabique, mi lec xmuyubaj yo'ntonic yu'un ti yulo' ti ta xc'ot ta snae, mi oy laj yac' sbaic ta tunel yu'un ti jch'unolajeletique, mi laj scolta ti buch'u ta xich' svocole, mi oy yan ti c'usi lec laj spasique, ja' xatsacbe ta vun sbiic taje.

¹¹ Pero ti tsebal me'lal antsetique, mu xatsacbe ta vun sbiic. Yu'un yic'al ti ta to xmalij ya'iique. Tey ta xch'ay ta yo'ntonic ti oy c'usi laj yal ta stojol ti Cristoe. ¹² Ja' yu'un un, ta sta smulic ti mu'yuc ta xc'ot ta pasel yu'unic ti laj yalic ti ta xac' sbaic ta tunele. ¹³ Yu'un ti mi ja' no'ox

ta spasic ti bu xva'vunet ta naetique, tey xlic ch'ajubicuc. Ja' jech xtoc ta xjoybijic ta jbole-sejc'opetic. Pero ma'uc no'ox ti ta xch'ajubique, yu'un tey chba stic' sbaic ti bu mu sventaicuque. Mu'yuc smelol ti c'usiuc no'ox ta sbol alic batele. ¹⁴ Jech o xal un, ta jc'an ti ac'o malijicuc ti tsebal me'lal antsetique, ti ac'o c'oticuc ta yajval nae. Ac'o sts'ites ti yolique, yo' jech mu xquich'tic labanel yu'un ti jcrontatique. ¹⁵ Yu'un oy jlom me'lal antsetic laj xa xch'ac sbaic. Yu'un ja' laj xa sts'acliic batel ti totil pucuje.

¹⁶ Mi oy jch'unolajeletic, mi vinic o mi ants, ti oy me'lal ants yu'unique, ac'o me scoltaic. Mu me xac'be sbain ti jch'unolajeletique, yo' jech ti stuquique xu' ta scoltaic ti yan me'lal antsetic ti buch'utic mu'yuc c'usi x'ayan yu'unique.

¹⁷ Ti ancianoetic ti lec ta sventainic ti jch'unolajeletique, sc'an ti ich'biluc ta muq'ue. Pero ja' más tsots sc'oplal ti ancianoetic ti buch'utic yabtelinojic o ta xcholel ti sc'op Diose, ti ta xchanubtasvanique. ¹⁸ Yu'un ta xal ti sc'op Diose: “Mu xavac'be svosal ti jmaj-trigo vacaxe”, xi. Ja' jech xtoc ta xal: “Ti j'abtele tsots sc'oplal ta xich' ti stojole”, xi.

¹⁹ Mi ta xtic'bat smul ti jun ancianoe, mu xach'un ta ora. Ja' to xach'un ti mi oy chib oxib rextigoe. ²⁰ Mi ta xvinaj ti oy smule, vulic ta sba ta sat ti jch'unolajeletique, yo' jech ta xi'ic ti yane. ²¹ Ta jc'ubanbot ta sba ta sat ti Diose, ti Cajvaltich Jesucristoe, schi'uc ti yaj'ángeltac ti t'ujbilic yu'une, jech me xapas o batel ti c'u s'elan laj calbote. Mu me jeltosuc avo'nton. Parejo xapas ta stojol ti jch'unolajeletique. ²² Mu me

ta orauc no'ox ta xava'an ti buch'utic ta x'ochic ta anciano yu'un ti jch'unolajeletique, naca mi amaquibe smul ti mi chopol ta xbat yu'unique. Q'uelo me aba yo' jech mu xc'ot ta pasel ti chopole.

²³ Ti jech loq'uel ta xa'ipaj yu'un ti ach'ute, mu me stucuc no'ox vo' xavuch'ilan. Uch'an jutebuc vino xtoc.

²⁴ Oy smulic jlom cristiano ti lec xvinaj ta q'uelel ti c'alal mu to ta xchapanatique. Pero oy jlom ti mu xvinaj ti smulique. Ts'acal to ta xvinaj.

²⁵ Ja' no'ox jech xtoc ti buch'u lec ti c'usi ta spase, lec xvinaj ta q'uelel. Pero oy jlom mu xvinaj ta ora. Pero mu ono'ox teyuc mucul ta xcom o.

6

¹ Ti mosoviletique, ac'o me yich'ic ta muc' ti yajvalique, yo' jech mu xchopol-c'optaat ti Diose schi'uc ti c'usi jch'unojtique. ² Ja' jech xtoc ti mosoviletique, mi ja' jch'unolajel ti yajvalique, mu me xalic ta yo'ntonic ti ja' yamal xa sc'oplal ta xich'ic ta muc' ti jech yermano sbaique. Yu'un ja' más to ac'o yich'ic ta muc'. Yu'un tey yac'oj sbaic ta tunel ta stojol jun jch'unolajel ti c'uxubinbil yu'une. Ja' me jech xaval, xachanubtasvan ti va'i s'elan taje.

Ti c'usi jch'unojtique schi'uc ti xijmuyubaje

³ Yan ti buch'u ta xchanubtasvan ti mu'yuc stuq'uile, ti mu xco'olaj schi'uc ti c'u s'elan lec ichanubtasvan ti Cajvaltuc Jesucristoe, ti mu xco'olaj schi'uc ti c'usi jch'unojtique ti ja' ta xijlecub yu'une, ⁴ ti buch'u jech taje, ja' jun toyobba ti mu sna' ti c'usi melele. Yu'un ja' no'ox

xchamelinoj ti ta stsacvan ta c'op ti c'usi ta xich' alele. Ti jech taje, tey ta xlic ti it'ix o'ntonale, ti mu jmojuc ti snopobile, ti ja' no'ox ta stsalvanic ta c'ope, ti mu junuc ti o'ntonale. ⁵ Mu'yuc spajeb ti leto yu'unique schi'uc ti buch'utic co'ol soquem ti sjolique, ti mu xojtiquinic ti melele. Yu'un ta snopic ti ja' pasob c'ulejal ti c'usi jch'unojtique. Ti buch'utic jech taje, mu me xachanbe yo'nton. ⁶ Melel, ti c'usi jch'unojtique, ja' taob muc' ta c'ulejal. Pero ja' no'ox ti buch'u jun yo'nton schi'uc ti c'usi x'ayan yu'une. ⁷ Yu'un mu'yuc ono'ox c'usi quich'ojtic talel ti c'alal lijvoc'otique. Ja' jech xtoc mu'yuc c'usi ta xquich'tic batel ti mi lijchame. ⁸ Pero ti mi oy jve'eltique, mi oy ti jc'u'tique, ja' no'ox jech yepal muyubajcutic yu'un. ⁹ Pero ti buch'u ta spas sba ya'i ta jc'uleje, mu xcuch yu'un ti lajeltsaele. Tey ta x'och ta pets' yu'un ti ep ta tos sc'upijel yo'nton ti altic no'oxe, ti ja' ta soquesatic oe. Tey ta stamic batel ti sbelal ch'ayeale. ¹⁰ Ti sc'upijel o'ntonal yu'un ti taq'uine, ja' me'mulil ta scotol. Yu'un oy jlom cristianoetic ti laj xa xrioxinic ti taq'uine. Jech o xal un, laj xa yictaic ta xch'unel ti Cajvaltique. Tey laj xa sta ep svocolic ti jech cuxul li' ta sba banomile.

Ac'bo yipal ta xch'unel lec ti Cajvaltique

¹¹ Ti vo'ot svinicot ti Diose, q'uejo me aba ta stojol scotol taje. Ja' me paso ti c'usi lec ta q'uelele. Paso me ti c'usi ta sc'an ti Diose. Ch'uno o ti Cajvaltique. Oyuc o ti sc'uxul avo'ntone. Oyuc o ti smuc'ul avo'ntone. Biq'uit xavac' aba. ¹² Ac'bo yipal ta xch'unel ti Cajvaltique, yo' jech xu' avu'un ta stsalel scotol. O'ntonino

lec ti acuxlejal sventa sbatel osile. Yu'un ja' jech smelol ti lataat ta iq'uel yu'un ti Diose. Ja' jech xtoc yu'un jamal laj aval ta sba ta sat ti rextigoetique ti ta xach'un o ti Cajvaltique. ¹³ Ta xajpasot ta mantal ta sba ta sat ti Diose ti ja' ta xac'be scuxlejal scotol ti c'usitic oye. Ta xajpasot ta mantal xtoc ta sba ta sat ti Cajvaltic Jesucristoe ti jamal laj yal sba ta stojol ti Poncio Pilatoe. ¹⁴ Ja' yu'un un, paso me ti va'i s'elan ta xcalbote, mu me xayanijes, yo' jech lec chbat ac'oplal. Jech me xapas o ti c'usi sjalil mu to ta xtal ti Cajvaltic Jesucristoe. ¹⁵ Yu'un oy bu ta xc'ot sc'ac'alil ti snopoj ti Diose ti ta xac'taluc ti Jesucristoe. Yu'un ja' no'ox stuc Dios ti tsots xu' yu'une, ti jelavem yutsile, ti ja' Ajvalil yu'un ti ajvaliletique, ti ja' Jpasmantal yu'un ti jpsasmantaletique. ¹⁶ Yu'un ja' no'ox stuc ti jech stalel o cuxule. Yu'un xojoban ti bu oye, ti mu'yuc buch'u xu' ta xnopaj teye. Mi ja'uc jun vinic yiloj ti Diose, mi ja'uc xu' sq'uel xtoc. Ja' yu'un un, ac'o ich'biluc o ta muc' sbatel osil. Oyuc smuc'ul stsatsal sbatel osil. Jechuc.

¹⁷ Ti buch'utic oy sc'ulejalic li' ta sba banomile, albo ya'iic ti mu me stoy sbaic schi'uque. Mu me spat yo'ntonic schi'uc ti sc'ulejalique. Yu'un ta jech yepal xu' ta xlaj sc'oplal. Ja' lec, ac'o spat yo'ntonic ta stojol ti Diose. Yu'un ja' cuxul. Yu'un ta xijyac'botic scotol ti c'usi ta xtun cu'untique yo' jech lec oyotic. ¹⁸ Albo ya'iic mantal ti ac'o spasic ti c'usi leque yo' jech ta xc'otic ta jc'ulejetic ta sventa ti lequil abtel ta spastique. Ta slequilaluc yo'ntonic, ac'o coltavanicuc schi'uc ti c'usi x'ayan yu'unique. ¹⁹ Ti mi jech ta spasic

taje, ja' tey xlic ya'iic ta yo'ntonic ti oy sc'ulejalic ti ta to xtale, ti ta staic ti ach' cuxlejal sbatel osil xtoque.

Ti slajeb mantal ti ic'ubanbat ti Timoteoe

²⁰ Timoteo, chabio me ti avabtel ti la'ac'bat abaine. Mu me xats'etan achiquin ta ya'yiell ti jeche' c'opetic ti mu'yuc yipe. Mi ja'uc xats'etan achiquin ta ya'yiell sc'opic ti cristianoetic ti oy sbijil ta xalic ti c'alal mu'yuque, ti ja' no'ox ta xcrontainvanique. ²¹ Yu'un oy jlom ti jech laj xch'unic ti c'op taje. Tey laj yicta sbaic ta xch'unel ti Cajvaltique.

Ac'o yac'bot bendición ti Diose. Jechuc.

**TI ACH' REXTOMENTO YU'UN TI
JESUCRISTOE**
**The New Testament in the Chamula dialect of the
Tzotzil language of Mexico**
**El Nuevo Testamento Nuestro Se Jesucristo en el
tzotzil de Chamula**

copyright © 1979, 1988, 2009 La Liga Bíblica

Language: Tzotzil de Chamula (Tzotzil)

Dialect: Chamula

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures. Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2016-06-21

PDF generated using Haiola and XeLaTeX on 22 Feb 2024 from source files dated 31 Aug 2023

dc66b2e5-d3c1-56bb-a6a9-34535eb445d3